



圖 1 之 1 - 防止虐待兒童會 facebook 出帖，促「停止暴力」，但就無講係叫邊個停止暴力。

【明報專訊】唔同立場嘅團體都不斷發聲明回應反修例風波，近日有啲被捕者都好年輕，甚至有中學生被警察追捕，防止虐待兒童會前晚嘅 facebook 發文，聲明就寫得幾玄，既無提及「警察」，亦無提及「示威者」。

聲明講起反修例風波引發好多暴力場面，愈趨升級同失控，話要「停止暴力，回應社會訴求，恢復社會安寧」，但無明言邊一方升級同失控。聲明又提到係媒體報道中見到「發生在港鐵車廂內及校園附近的追捕片段，當中有兒童、青少年及家長受到驚嚇傷害，有受驚嚎哭的、有被推倒受傷的、有被打至頭破血流的」。

Emily 相信係講到 8 月 31 日警察衝入港鐵車廂嘅情況，但全篇文無提到係邊個咁做，更加無提過「警察」兩個字。

聲明促請政府同各界以保衛兒童最佳利益為首要，譴責任何形式暴力，冀尊重年輕被捕者嘅法律框架下應有權利，以及「成立獨立調查委員會」等。

參考資料 Reference:

<https://news.mingpao.com/pns/%E6%B8%AF%E8%81%9E/article/20190905/s00002/1567622592797/%E3%80%90emily%E3%80%91%E9%98%B2%E8%99%90%E5%85%92%E6%9C%83%E5%8F%8D%E6%9A%B4%E5%8A%9B%E8%81%B2%E6%98%8E-%E5%86%87%E6%8F%90%E8%AD%A6%E5%AF%9F-%E7%A4%BA%E5%A8%81%E8%80%85>